

妙香室叢話

清張培仁著

第二冊

進步書局校印

水香齋集

卷一

詩

妙香室叢話卷三

經註平易

清 賀縣張培仁少伯甫編輯

簡齋先生云。六經古註最平易者。如人不知不愠。有所不知。則教誨之。而不愠。怒費而隱。言世道費。則君子隱去。天地位。萬物育。直指帝王。孔氏註。納於大麓。謂大錄。萬幾之政。能調燮陰陽。故烈風雷雨勿迷人也。說文以寢衣為被。方於長一身有半相合。趙岐註為長者折枝。按摩也。以支為肢。方於長者二字有屬。毛箋不日成之言。不與民立日限滿也。註大人者不失其赤子之心。即康誥如保赤子之義。言治民也。洪容齋以小星之詞。即殷其雷之旨。蓋使臣宵征。摒擋行李。不敢慢君命之意。不然。則牀帳衾裯。非一女子所能抱而來者。侯果以朋盍簪為冠簪之簪。少陵詩。盍簪誼列馬。已直用之。易莧陸直以莧為莧菜。商為商陸。不以莧為羊也。賈逵註。當仁不讓於師。師眾也。馬周以犬馬有養。主人子說。故疏稱臣早失父母。犬馬之養已無所施。毛西河註。山節藻梲。是諸侯所居。文仲以大夫而僭諸侯之禮。故譏之。與居蔡是兩事。天香樓偶得。解父母惟其疾之憂。父母二字略讀斷。其字指父母言。言為人子者。首

當以父母之疾為憂。蓋一則以喜。一則以懼之意。賢賢易色。指妻也。重德不重色也。子夏此章兼論五倫。蓋夫妻君臣父母朋友也。膏肓駁左氏年鈞以德德鈞以卜。以為君子所立人必從之何事於卜。康成箋之云。周禮有會羣臣萬民而詢立君一條。又安見其不可以卜也。故曰以雅以南。袁清溪以惟求則非邦也。與惟亦則非邦也。與皆夫子之言。非曾點問詞。蓋引求亦以証哂由為其不讓。非為其為邦故也。若曾點問詞則點固高士。不應屢解不明。若是之笨。黃東發以論語見其二子焉句在至則行矣之下。方與子路曰不仕無義有交合。否則子路無向空含曉曉之理。曾幾解弋不射宿言孔子不欲陰中人也。孫季昭解哀公問社以為哀公欲去三桓故問社者。問不用命戮於社之義。宰我勸之曰使民戰栗。孔子非之曰成事不說言三桓之勢已成矣。不可咎其既往也。白虎通以相鼠之詩為妻諫夫也。

說經新奇

隨園云。後世說經之新者。王充言曾點志於禮樂。將為舞雩之祭。所云童冠者。歌童也。馬融以百獸率舞者。筍簴也。木獸也。鳳凰來儀者。笙之刻為鳳形者也。簫聲之和也。不然。焉有朝廟中百獸能來之儀禮。韓文公巧言令色。孔任任即共工之名。與三

苗驩堯共稱劉質夫以紀侯大去其國大紀侯名也談助趙匡以左氏非人姓名古
帝王言則左史書之故曰左氏以為左邱明者悞也左邱明只作國語耳歐陽詹以
片言可以折獄乃夫子戒由也率爾之意非許之之詞曹澤解吾與女不如也以爲
吾與女皆不如顏淵也李穆堂解鄭聲淫作沾憑解歷引經集如詩之淫威左氏之
淫於元枵禮紀之母淫視聲淫及商孟子之淫詞知臨晉語之底著淫淫列子之朕
之過淫矣皆不作男女媒狎解况齊襄衛宣陳孔甯儀行父之事惟鄭鮮有聞焉安
得以聲淫為淫治之淫乎馬融解論語為力不同科為力役之征有上中下三科也
馮山公以為文王自稱王而尊紂為帝故祭公謀父稱商王帝辛其他商王無稱帝
者此其証予所否者晉藥肇以為不為否屈也言我道之所以否出者乃天意也陳
祥道言高宗彤日是祖乙祭高宗非高宗主祭也西伯戡黎者武王非西伯文王也

摘九經註疏

袁存齋先生云漢人註疏好臆造典故如康成以郊天之鼓必蒙麒麟之皮孔融笑
其寫孝經必用曾子家冊是也然非典之典業已二千餘年則文中引用頗資博雅
王伯厚摘其引漢語者作漢制攷予亦雜摘數條以新耳目如註伐崇引外傳天龜

即女枵星。齊之分野。大姜之祖也。有逢伯陵者。殷之諸侯。封之齊地。逢公之死。其神憑焉。周出於姜姓。為外祖所助。註九月大雩。引古之人有應上公者。古之神人通乎陰陽者。其雩之祝詞云。寡人當死。百姓何謗。願撫百姓以塞無狀。註周官。引緯書云。泰山失金雞。西嶽亡玉羊。註李姬與鄆子遇。防言魯季姬先配邾婁而淫鄆子。故二國交怨。宋襄為曹南之會。以和解之。邾子不從。乃執鄆子而用之。註大雩云。魯僖公放佞臣郭都等。理冤獄四十餘人。天乃大雨。註君奭云。散宜生受學於太公。太公徐師學之。禮酌酒切肺。約為朋友。註啟征云。有扈氏為啟度兄。賢堯舜而薄禹。以為不讓賢而傳子。故啟伐之。文王問太公用兵孰先。太公請伐密。管叔曰。不可。其君天下之明君也。伐之不義。太公曰。臣聞先王伐難不伐易。伐逆不伐順。遂伐密。密之人縛其君而來歸。註生民詩。引馬融曰。帝嚳四妃。上妃姜嫄。生稷。次妃姬訾。生摯。當三妃生子時。姜嫄未生。故禋祀求子。姜嫄任生之月。帝嚳崩。崩十月而后稷生。蓋遺腹子也。雖為天所授。以寡居而生子。為眾所疑。不可申說。知后稷之神奇。必不可害。故特棄之以著其神。堯知其然而聽之。註說命云。傳說蒙胥靡之衣。入高宗之夢。云我徒也。姓傅。名說。天下得我者。豈徒也哉。武丁悟而推之。曰。傅者相也。說者悅也。天下當

有傳我而悅民也。明以夢視百官，皆非也。乃使工寫其形，求諸天下。果見賢者胥靡衣褐露索，役於虞虢之間。金縢云：成王有疾，周公剪爪投河，乃書而藏之，記府有人言周亂，公出奔楚。所云罪人斯得者，周公之屬與知攝者。周公出奔二年，盡為成王所得。公傷之，恐其刑濫，乃作鴟鴞之詩以貽成王。註洛誥引詩傳稱周公將作禮樂，優游之三年不能成。君子恥其言而不見從，恥其行而不見隨。將大作，恐天下莫我知，將我作，恐不能揚父功業，乃營洛邑以觀天下之心。於是四方諸侯率其羣黨各攻位於其廷。周公曰：示之以力役，且猶至，況道之以禮樂乎？然後敢作禮樂。註侈兮侈兮，引顏叔子獨處隣婦夜遭雨，室壞趨之。叔子納之而使執燭，放乎旦而遂盡，縮屋而繼之，自以為避嫌之不審矣。若其審此，宜若魯男子矣。註采薇云：西伯將遣戍役，先與之期以采薇之時，今薇生矣，先輩可以行也。註鴛鴦章：古明王所乘之馬繫於廐，無事則委之以莖，有事乃與之穀。註西子：言西子在吳，過市人求見者輸一金錢。註內則：言諸侯取九女，兩兩而御，或三日，或四日，自后妃以至二十七世婦，八十一御妻，皆十五夕而御畢，以金環進之，以銀環退之。小星疏云：五日之中，一夜夫人四夜妾媵，夫人所專，不須設帳帳為妾設也。望前先尊，望後先卑，望前最賤，妾抱帳往。

貴者抱之還。望後貴者抱之還。何休亦以為夫人居中宮。少在前。註三以天下讓。謂逃去為一讓。太王死。李歷為喪主。計泰伯不來奔喪。為二讓。斷髮文身為三讓。尚書正義曰。舜耕歷山。夢眉長與髮等。康成曰。四岳者。羲和。羲仲。四人之子也。四人之子。又為八伯。論語隱義註。由也不得其死。然衛蒯聵亂。子路與師往。有孤黯者當師。曰。子欲入耶。曰。然。黯從城上下麻繩。鈎子路半城。曰。為師耶。為君耶。曰。在君為君。在師為師。黯因投之。折其左股。不死。黯開城欲殺之。子路目如明星。之光曜。黯不能前。謂曰。畏子之目。願覆之。子路以衣袂覆目。黯遂殺之。

摘史記註

子才先生云。史記古誼。唐司馬貞作索隱。張守節作正義。其采取古書。常摘出之。如引龍魚河圖云。蚩尤兄弟八十一人。並獸身人語。銅額食沙。帝不能征。仰天而歎。天帝乃遣元女下授兵符。引山海經云。帝令應龍攻蚩尤。尤請風伯雨師以從。黃帝乃下天女曰魃以止雨。雨止。乃殺蚩尤於凶黎之谷。引帝王紀云。帝夢大風吹天下塵垢去。有持千鈞之弩。驅羊旦而占之。乃得力牧風后。帝元妃西陵氏女。曰嫫祖。生昌意。次妃方雷氏。生青陽。次妃彤魚氏。生夷鼓。次妃嫫母。在三人之下。堯初生時。其母

在三阿之南。寄養長孺家。故從母所居之姓為伊耆氏。引列女傳云。堯女長曰娥皇。次曰女英。大戴禮作女媭。舜之親戚。謂象妹。穀首等也。引通史云。瞽叟使舜滌廩。舜告二女。女曰。去汝裳衣。鳥工往使舜穿井。舜告二女。女曰。去汝裳衣。龍工往。引列女傳云。陶子五歲而佐禹。引帝王世紀云。鯀妻修己吞神珠。薏以胸折而生禹。名文命。字高密。引楊雄蜀王本紀云。禹本汶山廣柔縣人。生於石紐。辛壬娶塗山。癸甲生啟。娶妻二日而生子也。羿臂長。故以射聞。伊尹者。力牧之後裔。引呂氏春秋云。有侏氏采得嬰兒於空桑。後居伊水。命名尹。尹正也。非命也。湯使之正天下也。劉向云。伊尹為湯言。素王及九主之事。九主者。法君。專君。授君。勞君。寄君。破君等。凡九品也。引帝王世紀云。紂倒曳九牛。撫梁易柱。妲己為有蘇氏女。見炮烙則笑。引六韜云。紂為酒池。回船糟丘。牛飲者三千餘人。烹伯邑考。食文王曰。誰謂西伯聖者。食其子羹。尚不知也。引鄭康成云。商容者。商樂官。知禮容。故今禮容署號容臺。引地里志云。傳險者。傳說所隱處也。故名聖人窟。孔安國云。傳岩有澗水。壞道。商王使刑人胥靡者築之。說乃代胥靡築以供食也。引劉向別錄云。鬻熊事紂。五諫而不聽。引帝王世紀云。穆王南征。楚人惡之。以膠舟迎王。至中流。王及祭公溺於水。其右游靡長臂多力。游水

得王尸。引周春秋云。杜伯受誅三年。宣王田於圃。日中杜伯起於道左。朱衣冠射中王心。折脊而死。赧王為諸侯所逼。負責於民。乃上臺避之。號避債臺。引博物志云。徐君室人孕一卵。以為不祥。棄之水。有犬鵠蒼銜卵歸。覆煖之。生兒。後為偃玉。有筋而無骨。鵠蒼臨死。生角而九尾。化為黃龍。引錄異傳云。秦文公伐雍南山梓樹。樹神畏披髮。故置髦頭。引舒雅史纂云。宋大丘社亡。亡者自亡也。猶秦鼎之自飛也。引茅盈內紀云。始王三十二年九月。盈曾祖蒙於華山升天。童謠曰。神仙得者茅初成。駕龍上升入太清。時下元洲戲赤城。繼世而往在我盈。帝若學之藏嘉平。始皇聞之。方有神仙之志。引陳留風俗傳云。沛公喪母於黃鄉。為帝後。以梓宮招魂葬。有丹蛇在水。躍入棺。其浴處有髮。號昭靈夫人。引三輔故事云。始皇時。隱宮之徒。至七十二萬。所割男子之勢。高積成山。高祖被十創。十二矢。石中通者四。卒以征陳。狝中流矢崩。引皇甫謐應劭云。太公名端。字執嘉。呂公名文。字叔平。亭長卒名弩父。引老子道德經云。月中仙人宋無忌。白澤圖云。火之精曰宋無忌。蓋火精也。引解道彪齊記云。古有日夜出。見於東境。故萊子立城。號不夜城。引風俗通云。李冰為蜀守。江神取女二人。冰以己女為神婚。遂入江。與神鬪。良久有雨。蒼牛鬪於江。夢中告主簿曰。南向腰中。

正白者。我綬也。主簿遂刺殺北面者。引越絕書云。吳王塚在猶亭西。卑猶之右。夫差
縊後。越王使干戈人。以一罍土葬之。引馬融曰。蒼兕主舟官。王充以為水獸。九頭故
武王伐紂。軍中誓之。以懼眾也。引括地志云。齊桓公塚在牛山。晉永嘉時伐之。得石
版水銀池。有毒氣。不得入。經數日。牽犬入之。得金數十箔。人骨狼籍。蓋殉者也。引司
馬彪曰。箕子名胥餘。夏侯元曰。微子。仁之窮也。箕子。智之窮也。引宋均註樂緯曰。熊
渠嗣熊摯有惡疾。別封於夔。引春秋緯云。蕭何感昴精而生。楚漢春秋。高祖封張負
為鳴雌亭侯。引漢名臣奏曰。武帝難河間五策。王悉條對。帝赧然忘之。曰。湯以七十
里。文王以百里。王其勉之。王知其意。歸宴樂以終。引姚字識名云。天子諸侯妃有月
事者。以丹注面。令女史見之。又秦漢律。見婢變不得侍。說文。婢。女汗也。引外傳云。孤
竹君是成湯時三月丙寅日所封。夷齊父名初。字子朝。姓墨胎。伯夷名允。字公信。叔
齊名智。字公達。夷齊諡也。引元妙內篇云。李母懷胎八十一年。歇李樹下。剖左腋生
老子。引千寶山日記云。徵在生孔子空桑之地。今名寶竇。在魯南山之空竇水中。無
水。當祭掃。則有清泉出焉。祭訖泉枯。今名女陵山。魯得龜陰之田。築城以旌孔子之
功。號謝城。引琴操云。孔子至匡郭外。顏淵舉策指穿垣曰。往與陽貨從此入。匡人乃

圍之。孔子援琴而歌。有大風擊。軍士僵。乃免。引戰國策云。豫讓刺趙襄。不得。請襄子衣而擊之。衣盡生血。襄子回輪而亡。引燕丹子曰。軻與丹遊東宮池。拾瓦投龜。太子捧金丸而進之。又共乘千里馬。軻曰。馬肝美。遂殺馬進肝。又美人鼓琴。軻曰。好手。遂斷手以玉盤進之。引宏照定古文尚書序云。秦既焚書。乃密種瓜於驪山陵谷中。溫處瓜實。詔博士諸生說之。人言不齊。乃令就視為伏機焉。俟諸生至。方相難不決。因發機而填以土。終乃相壓無聲也。今新豐縣溫湯之處。號愍儒鄉。

韋莊

五代韋端已以豔語見長。應舉時遇黃巢犯闕。著秦婦吟云。內庫燒為錦繡灰。天街踏盡公卿骨。人稱為秦婦吟秀才。鑑誠錄云。詩之作也。窮達之分可見。莊感懷七律詩末句云。大道不將爐冶去。有心重立太平基。其詩甚壯。故至臺輔。北夢瑣言。杜荀鶴嘗吟一聯云。舊衣灰絮絮。新酒竹簞簞。或語莊莊擬之曰。印將金鎖鎖。簾用玉鈎鈎。即大拜之祥也。胡孝轅癸籤云。韋莊詩靜極却嫌流水鬧。閒多翻笑野雲忙。本於老杜之水流心不競。雲在意俱遲。但多著一嫌字笑字。覺非真閑真靜耳。又莊卒之歲。日誦杜甫白沙翠竹江村暮。相送柴門月色新之句。吟諷不置。及卒。葬白沙之陽。

十國春秋莊有美姬善文翰高祖託以教宮人為辭強奪去莊作謁金門詞憶之云
空相憶無計得傳消息天上嫦娥人不識寄書何處覓新睡覺來無力不忍把君書
迹滿院落花春寂寂斷腸芳草碧姬聞之不食而死又莊常取唐人麗句勒成一集
其自序云謝元暉文集盈編止誦澄江之句曹子建詩名冠古惟吟清夜之篇是知
美稼千箱兩歧殊少繁絃九變大獲終稀入華林而珠樹非多閱眾籟而紫繡惟一
所以擷芳林下拾翠巖邊沙之汰之姑辨辟寒之寶幾雕幾琢方成瑚璉之珍故知
領下採珠難求十斛管中窺豹但取一班思食馬留肝徒云染指豈烹魚去乙或至
傷鱗自慙乎鰓腹易盈非嗜其熊蹯獨美然則律者既採繁者是除何知黑白之鵝
強識淄澠之水莊文詞甚多不具錄戊籤莊浣花集弟藹編錄序云家兄自庚子亂
離前凡著歌詩文章數十通屬兵火迭興簡編俱墜惟餘口誦者所存無幾耳後流
離湮泛寓目係情迄於癸亥歲又綴僅十餘首辛酉春應聘為蜀奏記明年浣花溪
尋得杜工部舊址結茅為室思其人欲成其處藹因錄兄稿或謂誦者次為十卷目
之曰浣花集

貫休

古今詩話。唐昭宗以錢武肅平董昌功。拜鎮東軍節度使。自稱吳越國王。貫休投詩。有滿堂花醉三千客。一劍霜寒十四州之句。武肅愛其詩。遣諭令改為四十州。乃可相見。答曰。州亦難添。詩亦難改。閑雲孤鶴。何天不可飛。遂入蜀。五代史補。僧貫休。婺州蘭溪人。有逸才。嘗遊荆南。時成汭為荆南節度使。生日。有獻歌詩頌德者百餘人。而貫休在焉。內命幕僚鄭準定其高下。準害其能。輒以貫休為第三。貫休怒曰。藻鑑如此。其能久乎。遂入蜀。及至。值王建稱藩。因獻詩云。一瓶一鉢垂垂老。千水千山得得來。建大悅。遽加禮待。泊偕大號。以為國師。賜號曰禪月。錦繡萬花谷。一生不畜買田錢。華屋何心亦偶然。客至多逢僧在坐。釣歸惟許鶴隨船。又云。家為買琴添舊債。厨因養鶴減晨炊。又云。粘粉為題樓鳳竹。帶香因洗落花枝。皆貫休句。

文殊湧現

橋李詩繫。文喜嘗往五臺。至金剛窟。遇一老翁。文喜問此間佛法如何。住持曰。龍蛇混雜。凡聖同居。曰。多少眾。翁曰。前三三。後三三。翁呼童子致茶。並進酥酪。喜納其味。心意豁然。辭退。問此何處。曰。此般若寺。乃悟翁即文殊也。但見五色雲中。文殊乘金毛獅子往來。咸通三年。至洪州參仰山。一旦煮粥。見文殊現鉢上。喜以攪粥。蔑掌之。

曰文殊自文殊。文喜自文喜。文殊湧空曰。苦瓠連根苦。甜瓜比蜜甜。修行山三大。却被老僧嫌。寂化之日。白光照室。竹樹同色。

任濤

撫言。任濤。豫章人。詩名早著。有露團沙鶴睡。人卧釣船流之句。李隱廉問江西與放鄉里之役。民俗互有論。外隱判曰。江西界內。凡有詩得似濤者。即與免役。

平仄兩用

陸放翁燒灰除菜蝗。蝗字作仄聲。莫折紅芳樹。但知盡意看。但字作平聲。李山甫赴舉別所知詩。黃祖不憐鸚鵡客。志公偏賞麒麟兒。麒麟字作仄聲。王建贈李僕射詩。每日城南空挑戰。挑字作仄聲。贈田侍中詩。綠窗紅燈酒。燈字作仄聲。皆本香山之以司為四。琵琶為別。凝脂為佞。紅欄三百九十橋。十字讀謔也。韓愈岳陽樓詩。宇宙隘而妨。作訪音。東都詩。新輩只朝評。評作病音。元稹東南行百韻詩。徵俸封魚租。封音副。病卧詩。一生長苦節。三省詎行怪。怪音乖。嶺南詩。聯遊虧片玉。洞照失明鑒。鑒音間。夜池詩。高屋無人風。張幕張音丈。苦思正旦。酌白雪。閒觀風色動青旂。正旦讀作真丹。又白居易和令狐相公詩。仁風扇道路。陰雨膏閭閻。扇平聲。膏去聲。李商隱石城詩。

簾冰將飄枕簾烘不隱鉤。自註冰去聲。陸龜蒙包山詩。海客施明珠。湘蕤料淨食。自註料平聲。朱竹垞山塘紀事詩。殷勤短主簿。端笏立阼階。阼音徂。杜少陵用中興中酒王氣貞觀等字。忽平忽仄。隨其所便。大抵相與之相。燈擎之樂。親迎親家之親。甯馨之甯。蒲桃之桃。鄼侯之鄼。馬援之援。別離之離。急難之難。上應之應。判捨之判。量移之量。處分之分。范蠡之蠡。彌衡之彌。伍員之員。皆平仄兩用。

文過

本朝有某孝廉。獻吳逆詩云。力窮楚覆車。秦救心死韓。亡受漢封聖。祖愛具工於用典。遣人訪之。其人逃。以為此倣宋汪彥章為張邦昌罪表也。其詞云。孔子從佛胎之召。本為尊周紀。信乘漢王之車。將以誑楚。可謂善於文過者。

翰林改官

袁大史云。余以翰林改官江南。一時送行詩極多。其佳者如劉文定公綸時官編修。詩云。弱水神仙少定居。詞頭草罷領除書。蔣山南去秦淮路。好雨脩脩梅熟初。三載頭銜共冷官。幾人鄉夢出長安。君行若過吾廬外。五月江深草閣寒。定子當筵唱石城。離堂燭跋不勝情。菱荷香動三千里。誰共編詩記水程。宗伯齊公召南時為侍講。

詩云尊前言別重踟躕。一向推袁詰豈虛。才子何妨為外吏。名山况可讀奇書。携將佳偶花能笑。吟得新詩錦不如。轉眼蒲帆催北上。未容風物戀鱸魚。官河柳色雨如新。故里風光更絕倫。書畫一船煙外月。湖山十里鏡中人。浣衣香裏芙蓉露。評史清澆竹葉春。回首同時趨直客。蓬萊猶是在紅塵。莊參政有恭時為修撰詩云。廬陵事業起夷陵。眼界原從閱歷增。况有文章堪潤色。不妨風骨露峻嶒。廉分杯水余同況。明澈晶籠爾獨能。儒吏風流政多暇。新詩好與寄吳綾。副憲申甫時為孝廉詩云。鴈行驚失鳳池春。百里初除墨綬新。簿領竟須煩史筆。朝廷原自重儒臣。交情未免憐今別。公論尤應惜此人。終是讀書能有用。他時端不負斯民。鶴書當日廣求賢。殿上揮毫各少年。遭遇未嘗非盛事。滯留或恐是前緣。公卿譽滿君猶出。婢僕詩成我自憐。可憶僧窗風雨夜。燈花只為一人妍。戊午榜發前一日與張少儀諸人同飲喜燈有花惟君獲雋平臺縹渺見煙巒。客至能令眼界寬。談笑每欣多舊雨。杯盤常愧累貧官。由來氣類關偏切。此後風流繼必難。說與工詩姚秘監。豪情略為洗儒酸。戲姚南青臨期草草話難窮。高柳涼飄弄袖風。客裡驚心多聚散。酒邊分手又西東。對衙山色濃如染。繞郭溪光淡若空。此景江南曾不少。有人時在夢魂中。其時長安諸公以笏山四首為獨絕。少宗伯劉公